



PAUL ROOS

GIMNASIUM | GYMNASIUM

☎ (021) 887-0017/77 📠 086 651 5969
info@paulroos.co.za | www.paulroos.co.za
Suidwal, Stellenbosch, 7600, South Africa

Geagte Ouers/Voogde

Baie dankie vir u navraag i.v.m. die moontlike toelating van u seun tot Paul Roos Gimnasium. Ons vertrou dat u uit hierdie prospektus genoegsame inligting sal bekom om die regte keuse t.o.v. u seun se verdere skoolloopbaan te maak. Ons is dankbaar om te kan sê dat die skool (en Stellenbosch) oor uitstekende onderwys-, kultuur- en sportgeriewe beskik. Daarby is die vakkeuse van die skool uitgebreid en behoort dit die belangstellingsveld van bykans elke seun te dek. Uitstekende kwalifikasies én die vermoë om die nuutste onderwyskundighede en -tegnieke toe te pas, is slegs twee kenmerke van die personeel. Die geleentheid vir u seun om te ontwikkel tot 'n afgeronde, gedissiplineerde en selfstandige persoon, is op 'n besondere wyse beskikbaar by Paul Roos Gimnasium.

In gevalle waar leerlinge toelating verlang in Graad 8 vanaf die begin van 2023, is die sluitingsdatum **14 April 2023**. Aansoeke word vanaf **13 Maart 2023** op die webtuiste van die WKOD gedoen: (<https://wcedonline.westerncape.gov.za/>).

Indien u seun aanvaar word, sal u van meer spesifieke inligting t.o.v. skoolgeld, hand- en skryfboeke en skooltye, ens. voorsien word nadat die begroting vir 2023 by die ouerbegrotingsvergadering, wat op 31 Oktober 2023 sal plaasvind, goedgekeur is.

Slegs aansoeke wat in ooreenstemming met die instruksies op die webtuiste van die WKOD gedoen is, kan oorweeg word.

Ons sien uit daarna om u aansoek te ontvang. 'n Erkenning van ontvangs sal aan alle aansoekers uitgereik word. Indien u nie 'n ontvangserkenning ontvang nie, het ons nie u aansoek ontvang nie.

PRG-groete.

André van Staden
REKTOR

PAUL ROOS GIMNASIUM

PROSPEKTUS

INHOUD

1. Doelstellings
2. Skoollied
3. Geskiedkundige oorsig
4. Algemene inligting
5. Fasiliteite
6. Skoolreëls/Gedragkode
7. Skooldrag

DOELSTELLINGS VAN PAUL ROOS GIMNASIUM

1. Paul Roos Gimnasium onderskryf Christelike opvoedkundige beginsels, met die eerbiediging van elke ouer en kind se geloofsoortuigings.
2. Die primêre doelstelling van die skool is om die seuns op holistiese wyse te help om kennis en vaardighede te verwerf en om hulle vermoë tot selfstandige denke te ontwikkel.
3. Die sukses van die opvoedingstaak van die skool is in 'n hoë mate afhanklik van die fondament wat deur die ouers tuis gelê word. Daarom is dit die skool se doelstelling:
 - 3.1 om aan die ouers medeseggenskap en medeverantwoordelikheid in die onderwys van hulle seuns te gee;
 - 3.2 om die ouer in sy/haar opvoedingstaak by te staan en aan te vul.
4. Paul Roos Gimnasium is onlosmaaklik verbonde aan die gemeenskap van Stellenbosch. Daarom stel die skool dit as doelstelling:
 - 4.1 om die gemeenskap van dit wat die skool bied, bewus te maak en om van bestaande kundigheid in die gemeenskap gebruik te maak.;
 - 4.2 om die seuns aan te moedig om die gemeenskap te dien.
5. Om aan elke seun 'n gebalanseerde opvoeding te bied, is kwaliteitsonderrig van kardinale belang. Daarom is ook die volgende doelstellings van belang:
 - 5.1 die werwing en behoud van kwaliteit opvoeders, wat streef na vernuwing en selfontwikkeling om sodoende elke opvoedingsgeleentheid optimal te benut.;

DIE SKOOLIED

Verhef die roem van onse skool
Ons hou deur ons land hom hoog
En waar ons gaan en waar ons staan
Ons vleg steeds aan sy ereboog
Hef aan, hef aan, in roem en sang
Ons werk en glorie sy belang
Semper, Semper Splendidior!
Semper Splendidior!

SCHOOL SONG

Salute the name of our famous school
Uphold it country wide
And through ev'ry action brave and true
We carve this name with pride
Sing out, sing out aloud and let its fame be known
We're proud to claim it as our own
Semper, Semper Splendidior!
Semper Splendidior!

DIE GESKIEDENIS VAN PAUL ROOS GIMNASIUM



Ds. J.H. Neethling, leraar van die Stellenbosch N.G. Moedergemeente, skryf op 29 Januarie 1864 aan dr. Langham Dale, Kaaplandse superintendent-generaal van onderwys:

"As a piece of news that will interest you, I may state that yesterday (28 January 1864) 30 inhabitants of this district have decided to erect a gymnasium or Latin School. They have guaranteed 465 pounds (R930) per annum, chosen a Board of Directors of five persons to carry out the resolutions with all possible speed and decided that as soon as possible a preparatory school or infant department shall be established."

- 1866 Die skool se inwydingsplegtigheid word op 1 Maart gehou met ongeveer 800 mense, insluitend 88 leerders en die eerste skoolhoof, eerw. William Braid. Die eerste skoolgebou kan steeds by 120 Dorpstraat gesien word.
- 1869 Eerw. Charles Anderson word aangestel as die tweede skoolhoof
- 1874 Die skoolhoof staan nou as "rektor" bekend. Die tweede skoolgebou, tans steeds stewig op die hoek van Pleinstraat en Van Ryneveldstraat, word betrek
- 1880 Mnr. William Milne word rektor; die derde Skot wat die pos betree
- 1887 Die eerste koshuis vir die seuns word geopen onder toesig van mnr. J.D. Krige, wie se erenaam later Oom Japie "Home" word.
- 1897 Die skool trek na 'n nuwe gebou in Andringastraat (sedertdien afgebreek) en staan bekend as "Hogere Jongens School Stellenbosch".

- 1903 Die Rhodesbeurs word ingestel. W.M. MacMillan is die eerste ontvanger van die beurs, wat tot vandag aan oudleerders toegeken word vir nagraadse studie aan Oxford Universiteit.
- 1906 Paul Roos is kaptein van die eerste Suid Afrikanse Rugby span op 'n oorsese toer na Brittanje.
- 1907 Die skoolgebou skuif vanaf Andringastraat na die gebou wat tans gebruik word vir die Departement van Visuele Kunste in Viktoriastraat. Die Paul Roos helmteken word vir die eerste keer gebruik
- 1910 Paul Roos word aangestel as rektor
- 1931 Kosgangers van Prima koshuis betrek 'n nuwe gebou
- 1940 Paul Roos, ook bekend as "Oom Polla", tree af na 30 jaar se pligsgetroue dien en word opgevolg deur mnr. Daniël Blignaut.
- 1946 Op 27 September stap 564 leerders na die nuwe skoolgebou op die Suidwal van die Eersterivier. Die skool se naam verander terselfdetyd na Paul Roos Gymnasium
- 1951 Die hoër-en primêre afdelings van die skool word onafhanklik en staan bekend as PRG (Paul Roos Gymnasium) en LPR (Laerskool Paul Roos).
- 1952 Mnr. D. Blignaut word opgevolg deur mnr. AK de Jager. Die studenteraad en skooluniform word ingestel.
- 1959 Mnr. Gert Smit word aangestel as rektor
- 1965 Reeds in hierdie jaar ontstaan die tradisie om die skoolverjaarsdag (1 Maart) te vier deur o.a. ruikers by die standbeelde van die stigterslede van die skool te lê. Die nuwe koshuis, bekend as Prima Nova, word betrek.
- 1977 Die laerskole van Paul Roos en Bloemhof amalgameer (word Eikestad Laerskool).
- 1981 Die Markötter pawiljoen word vir die eerste keer gebruik. Mnr. Johan Slabbert word deur mnr. John Galloway opgevolg.
- 1986 Die Laerskool Paul Roos gebou word deel van die Gymnasium. Dit staan vandag

- nogsteeds bekend as die LPR gebou.
- 1991 Die rektor se toga word geskenk deur dié jaar se matriek groep. Dit word steeds gebruik.
- 1993 Mnr. Jock de Jager, seun van vorige rektor mnr. AK de Jager, word aangestel as rektor
- 1997 Die eerste argief word geopen.
- 2000 Twee rekenaarsentrums word in die skool geopen.
- 2002 Die Paul Roos Sentrum word amptelik geopen deur mnr. Nelson Mandela.
- 2007 Mnr. Jannie van der Westhuizen word rektor
- 2009 Opening van die Antonij Rupert Akwatiese Sentrum
- 2013 Die Welgevallen-gebou word opgerig
- 2015 Paul Roos word die eerste skool om die Craven Week toernooi vir die tweede keer aan te bied.
- 2017 Mnr. André van Staden word aangestel as die nuwe rektor.
- 2017 'n Meesterplan vir PRG word ontwerp.
- 2018 Die Welgevallen-gebou word geverf en die stoepe word oorgedoen. Die Oud-Skoliere-kantoor en Tegnologie-sentrum word geverf.
- 2018 Fase 1 van die opgradering van die koshuise word voltooi met die oordoen van 48 beddens.
- 2018 Tennisbaanoppervlaktes word oorgedoen.
- 2018 Vloedligte word by 4 tennisbane geïnstalleer.
- 2019 Die US Kanseliersmedaljebord word onthul.
- 2019 US Eredoktorandi-bord word onthul.
- 2019 'n Kultuur-erebord word onthul.
- 2019 Die Hoofgebou, Markötterkompleks en die Japie Krige-saal en -kompleks word geverf.
- 2019 'n Nuwe boorgat word by Markötter gesink.
- 2019 Nuwe assistent-akkommodasie vir 8 volwassenes word gebou. Die bestaande assistente-akkommodasie word omskep in kamer wat ekstra beddens in die koshuis skep.
- 2019 Kamers by Nova word oorgedoen.
- 2019 Die matriekgronde word opgradeer.
- 2019 Die LPR-vierkant word opgradeer.
- 2019 'n Nuwe rektorswoning word gebou.
- 2019 By Markötter word 'n nuwe gimnasium by die binnenshuise veld gevoeg en nuwe ablusie-geriewe word gebou.
- 2019 Die fietsloods word oorgedoen en opgradeer.
- 2019 Die PRG *Brand Shop*, *Splendidior*, word gevestig.
- 2019 Roosinbosch word opgradeer in 'n moderne kafeteria / *coffee shop*
- 2020 'n Ontspanningslokaal by Nova word gebou. Die res van die ou ontspanningslokaal by Nova word omskep in koshuiskamers.
- 2020 Fase 3 van die koshuisopgraderingsprojek word gedoen - die opgradering van die oorblywende 45 kamers in Nova.
- 2020 Die eetsaal word opgradeer.
- 2020 Beide koshuis word geverf.
- 2020 'n Derde IT-lokaal word gevestig.
- 2020 Die sonkragprojek word voltooi.
- 2020 Die Stellenbosch Erfenisstigting ken aan ons Blouplaakstatus toe vir ons drie pragtige historiese geboue - Die Hoofgebou, die Japie Krigesaal en Die Laerskool Paul Roos, alombekend as die LPR.
- 2020 'n Voortgaande projek van die PRG-handelsmerk op die kampus.
- 2020 Die Markötter-krieketfasiliteit by Volkskombuis word opgradeer met plaveisel en bankies onder die bome en ook die aanplant van gras.
- 2020 Die Japie Krigesaal word opgradeer.
- 2020 Fasiliteite word benoem om erkenning te gee aan ons trotse en roemryke geskiedenis
- * Die Oude Leeskamer
 - * Gimnasiumplein
- 2020 Die LPR, Paul Roosentrum en beide koshuise, Prima en Prima Nova, word geverf.

- 2021 Die laaste fase van die opgradering van die kamers by Nova word voltooi.
- 2021 Die JF Marais Mediasentrum word ingewy.
- 2021 Die twee Tegnologiëklasse word opgradeer en kry 'n nuwe ingang.
- 2021 Die ou motorhuiskompleks lang Nova-koshuis word omskep in 'n klein koshuis, Secunda.
- 2021 Op die sonwyser in Gimnasiumplein word die name van alle akademiese personeel, wat in diens oorlede is, aangebring.
- 2021 Die nuwe Binnenshuise Krieketfasiliteit word ingewy. Die sentrum bestaan uit drie snelboulbane, een draaiboullaan en twee balmasjienlane. Die ou sintetiese oefennette word afgebreek en vervang met vyf nuwe sintetiese nete. Die ou turfnette word ook met nuwe turfnette vervang. Die nete langs Piet Retiefstraat word opgradeer.
- 2021 Twee van die kleiner klaskamers in die LPR-gebou word vergroot.
- 2021 Die fisiopraktyk, Sports Hub @ PRG, word gevestig op die kampus.
- 2021 Erkenning word gegee aan die PRG 150 Trust deur borde aan te bring by al die projekte waar die Trust 'n bydrae gemaak het, of deur die Trust befonds is.
- 2021 Gimnasiumtoerusting word vervang.
- 2022 'n Ereboard, wat erkenning gee aan kultuurgroepe wat op nasuionale vlak presteer, word aangebring.
- 2022 Die US ontwikkel twee velde en 'n krieketoval aangrensend aan die Paul Roos-oval.

**PAUL ROOS GIMNASIUM
ALGEMENE INLIGTINGSTUK**

A. BUITEMUURSE AKTIWITEITE

1. Sport (Leerders moet aan 'n somer en 'n winter aktiwiteit deelneem)

Die volgende sportsoorte word beoefen:

SOMER	WINTER
Atletiek	Skaak
Bergfietsry	Bergfietsry
Gholf	Gholf
Krieket	Hokkie
Swem	Rugby
Tennis	Sokker
Waterpolo	Muurbal
E-sport	E-sport
Sewes-Rugby	

2. Klubs en verenigings

Leerders kan betrokke raak by die volgende:

Debats- en Redenaarsvereniging	PRG Ensemble
Musiek, Kuns, en Drama-vereniging	Skoolkoerant (Semper & Concipio)
Noodhulp	Skoolkoor
Oorsese uitruiltoere	PRG Sanggroep
JAM	Drumline

B. MUSIEKAFDELING

Musiek (houtblaas-, slag-, strykinstrumente, klavier, orrel, kitaar, sang, koperblaas en blokfluit, "drumkit", elektriese-, akoestiese- sowel as baskitaar) word as vak aangebied.

C. GELDE BETAALBAAR (SOOS VIR 2023)

- 1. Skoolheffing:** R52 650 per kind per jaar - boeke uitgesluit
Betaalbaar: [maandeliks (oor 10 maande), kwartaalliks of as een bedrag vooruitbetaalbaar].
- 2. Losiesgeld:** R59 650 p.j.
Betaalbaar: Kwartaalliks vooruitbetaalbaar aan die begin van elke kwartaal of as een bedrag vooruitbetaalbaar.

**PAUL ROOS GIMNASIUM
FASILITEITE**

1. AKADEMIES

Paul Roos Gimnasium beskik oor die volgende fasiliteite:

- 1.1 'n mediasentrum;
- 1.2 drie Wetenskap/ Lewenswetenskaplaboratoriums;
- 1.3 'n Tegnologiesentrum, bestaande uit twee praktiese werklokale, 'n masjienkamer en twee tekenkamers (ook vir Ingenieursgrafika en Ontwerp);
- 1.4 musieksentrum;
- 1.5 twee volledig toegeruste rekenaarsentrums (70 rekenaars) vir die onderrig van Rekenaartoepassingstechnologie en Inligtingstechnologie;
- 1.6 'n argief;
- 1.7 die Japie Krige-saal wat 550 mense huisves; en
- 1.8 die Paul Roos Sentrum met 1500 sitplekke.

2. SPORT

2.1 Op die skoolperseel:

- 2.1.1 die hoof krieketveld;
- 2.1.2 tien beton krieketnette en agt turfnette;
- 2.1.3 ses tennisbane met spreiligte;
- 2.1.4 'n sokkerveld
- 2.1.5 'n klubhuis vir krieket;
- 2.1.6 twee swembaddens (een verhit)
- 2.1.7 'n gimnasium.

2.2 Markötter-sportterrein:

- 2.2.1 twee krieketvelde;
- 2.2.2 vyf rugbyvelde;
- 2.2.3 'n gras atletiekbaan;
- 2.2.4 'n klubhuis met kleedkamers- en kafeteria-geriewe, 'n kroeg en 'n onthaalsaal (100-150 persone) en 'n onderdak braaiarea; Markötter Suite (met lugverkoeler) kroegarea en dataprojektor. Die Longroom met kroegarea. Volledig toegeruste kombuis.
- 2.2.5 'n toe-pawiljoen vir ongeveer 1200 toeskouers met kleedkamergeriewe en 'n mediese kamer.
- 2.2.6 Binneshuise oefenveld
- 2.2.7 Ysbad

3. ANDER

- * 'n Kafeteria (Roosinbosch) vir leerders.
- * Splendidior - ons eie *Brand Shop*
- * Tweedehandse klere kan op bestelling by Me. Louise Carstens aangekoop word.
- * Die meeste fasiliteite van die Universiteit van Stellenbosch is ook beskikbaar aan leerlinge wat aansluit by die klubs van die universiteit. So is daar o.a. 'n moderne gimnasium, 'n binneshuise verhitte swembad en 'n tartan atletiekbaan.
- * Die skool maak eksklusief gebruik van Maties se hokkiefasiliteite vir afrigting en wedstryde.
- * Daarby word op groot skaal gebruik gemaak van afrigting deur buite-afrigters vir o.m. rugby, sokker, hokkie, swem, atletiek en tennis.

4. KOSHUISE

- 4.1 Prima Koshuis: Huisves 104 leerders
- 4.2 Prima Nova Koshuis: Huisves 141 leerders



Erekode

As 'n ware Paul Rooser verklaar ek dat ek die edel waardes en tradisies van my skool eer. Ek is trots op my skool en my voorkoms, ek respekteer ander en tree op soos 'n ware heer.

Ek eer onvoorwaardelik my ouers, onderwysers en ander outoriteitsfigure sodat ek kan groei in gehoorsaamheid.

Verhoudings is vir my belangrik en ek voeg waarde toe deur ander te bemoedig met die wete dat ek daaglik deel vorm van Paul Roos geskiedenis.

Ek lewe met passie, integriteit en nederigheid.

Ek verwerp passiwiteit, gemiddeldheid en selfgesentreerdheid en aanvaar verantwoordelikheid vir my rol as kultiveerder.

Ek kies om te doen wat reg is en ek streef na uitnemendheid op alle gebiede...

...ten einde ons leuse "Semper Splendidior" waardig te wees.

Gedragkode vir leerders

Die gedragkode van Paul Roos Gimnasium is gebaseer op trots vir die skool, onderlinge respek en gentleman-skap.

1. Enige oortreding van die landswette van Suid-Afrika wat as 'n kriminele oortreding beskou word, asook enige daad van wangedrag in terme van die Suid-Afrikaanse Skolewet, word as 'n oortreding van hierdie gedragkode beskou.
2. Die reëls, reëlings, beleidsdokumente en regulasies van die skool word beskou as 'n byvoegsel tot hierdie gedragkode.
3. Die leerders sal hulle te alle tye gedra as goeie ambassadeurs van die skool.
4. Die persoonlike voorkoms en kledrag van leerders moet voldoen aan die voorskrifte soos deur die skoolgemeenskap gestel.
5. Leerders moet die volle akademiese skooldag bywoon.
6. Daar word van leerders verwag om te voldoen aan alle redelike versoeke en opdragte van opvoeders.
7. Leerders op die skoolterrein, onder toesig van die skool of in skooldrag, mag nie die veiligheid van ander persone bedreig nie of in besit wees van enige wapen, implement wat 'n gevaar inhou vir die skoolgemeenskap nie.
8. Leerders op die skoolterrein, in skooluniform of onder toesig van die skool, mag nie in besit wees of gebruik maak van onwettige of verbode middels, sigarette of tabakprodukte, e-sigarette, dwelms, alkohol of ongewenste materiaal soos omskryf in die gedragsreëls van die skool.

9. Skooleiendom en die eiendom van ander mag nie geneem, beskadig of vernietig (gevandaliseer) word nie.
10. Leerders moet deelneem aan die opvoedkundige programme van die skool soos deur die onderwysdepartement voorgeskryf, tensy vrystelling deur die onderwysdepartement gegee is.
11. Leerders mag nie ander leerders, opvoeders of lede van die skoolgemeenskap seksueel of op enige ander wyse teister, dreig, afknou (fisies, emosioneel, kuber) met hulle baklei, intimideer of op enige materiële, fisiese of emosionele wyse te na kom of benadeel nie.

SKOOLREËLS

1. ALGEMENE REËLS

- 1.1 Leerders sal hulle te alle tye as goeie ambassadeurs van die skool en ooreenkomstig die gedrags- en erekode van die skool gedra.
- 1.2 Terwyl leerders in die skool se drag of enige gedeelte daarvan geklee is wat voldoende is om hulle in die oë van die publiek met die skool te verbind, of terwyl leerders die skool verteenwoordig, hetsy direk of indirek, hetsy as deelnemers, ondersteuners, helpers, toeskouers of andersins, sal hulle hulself van enige gedrag weerhou wat die skool, personeel of hul medeleerders in 'n slegte lig kan stel.
Indien daar 'n verbintenis met die skool via enige sosiale media platform, hetsy direk of indirek, sal leerders hulle weerhou van enige gedrag wat die skool, die personeel en medeleerders se goeie naam in gedrang kan bring.
- 1.3 In hul wisselwerking met die rektor, opvoeders en ander skoolpersoneel, moet leerders te alle tye die nodige hoflikheid en respek betoon en hulle weerhou van optrede wat op oneerbiedigheid of opstandigheid neerkom.
- 1.4 In hul wisselwerking met mekaar, moet leerders sover moontlik selfbeheersing aan die dag lê en wedersydse respek en verdraagsaamheid betoon. In die besonder moet leerders hulle weerhou van enige gedrag wat daarop gemik is om die fisiese, geestelike en morele welstand van enige ander leerder te skend, of wat daartoe kan aanleiding gee. Enige seksuele of onbehoorlike fisiese kontak tussen leerders op die skoolterrein of enige ander plek waar hulle as leerders van die skool uitgeken kan word, is streng verbode.
- 1.5 'n Opvoeder van die skool sal oor dieselfde regte as 'n ouer beskik wat betref die beheer en dissipline van die leerder volgens die gedragskode, sowel gedurende die leerder se skoolbywoning as gedurende enige skoolaktiwiteit.
- 1.6 Leerders mag nie in die klaskamer, saal of biblioteek eet of drink nie. Die kougom gedurende skoolaktiwiteite is verbode. 'n Onderwyser mag 'n leerder toestemming gee om water te drink indien nodig.
- 1.7 Selfoongebruik gedurende skoolaktiwiteite is streng verbode. Die selfoonbeleid word streng toegepas.
- 1.8 Die rook, besit en/of gebruik van tabakmiddels, e-sigaret, drank, ander alkoholiese middels of dwelmmiddels en die besit/verspreiding van pornografiese materiaal gedurende enige skoolaktiwiteit of wanneer leerders in skooldrag geklee is, is verbode. Die skoolterrein is 'n drank-, dwelm- en vuurwapenvrye area.
- 1.9 In geval van 'n redelike vermoede dat leerders hulself aan 'n oortreding van hierdie gedragskode of die landswette skuldig gemaak het, het die skoolhoof of 'n opvoeder die reg om sodanige leerders en/of die eiendom in hul besit vir enige gevaarlike wapens, gewere, dwelms of ander skadelike en gevaarlike middels, gesteelde goedere of pornografiese materiaal te deursoek wat die leerders moontlik op die skoolterrein kon bring. Sodanige leerders se menswaardigheid sal deurentyd respekteer word, en dus sal die deursoeking privaat, deur persone van dieselfde geslag, en in die teenwoordigheid van nóg 'n persoon geskied. Die deursoekingsproses en -uitkoms moet opgeteken word.
- 1.10 Enige optrede wat die administrasie, dissipline of doeltreffendheid van die skool onbillik benadeel, sal as 'n oortreding van hierdie gedragskode beskou word.
- 1.11 Skuldigbevinding deur 'n hof aan 'n strafregtelike oortreding sal as 'n oortreding van hierdie gedragskode beskou word.

- 1.12 Oortredings wat tot skorsing en/of uitsetting kan lei, sluit in, maar is nie beperk nie tot:
- optrede wat ander se veiligheid bedreig en wat die regte van ander skend;
 - die besit, dreigement of gebruik van gevaarlike wapens;
 - die besit, gebruik, verhandeling of sigbare bewys van narkotiese of ongemagtigde dwelms, alkohol en bedwelmende middels van enige aard;
 - bakleiery, aanranding of mishandeling;
 - onsedelike gedrag of 'n gevloek;
 - die aanneem of voorhou van 'n vals identiteit;
 - enige vorm van haatspraak, seksisme, rassisme of ander antisosiale gedrag;
 - diefstal of die besit van gesteelde goedere, wat die diefstal of besit van toets- of eksamenvraestelle voor sodanige toets of eksamen insluit;
 - onregmatige optrede teenoor en/of vandalisme, die vernietiging of beskadiging van skool eiendom wat die aanbring van graffiti sou insluit;
 - oneerbiedigheid, aanstootlike gedrag en verbale mishandeling gerig teen opvoeders of ander skoolpersoneel of -leerders;
 - herhaalde oortredings van skoolreëls of hierdie gedragskode;
 - strafregtelike en onderdrukkende gedrag, soos verkragting en geslagsgebaseerde teistering;
 - viktimisasie, afknouery en intimidasie van ander leerders;
 - die oortreding van eksamenreëls; en
 - opsetlike en bewuste verstrekking van vals inligting, of die vervalsing van dokumente, ten einde onbehoorlike voordeel te bekom.

2. KLASREËLS

- 2.1 Die klasopvoeder moet, ná oorleg met die klasleerders sowel as hul ouers, klasreëls opstel wanneer hierdie gedragskode aanvaar word, en aan die begin van elke daaropvolgende skooljaar. (Generiese klasreëls ingesluit)
- 2.2 Die klasreëls moet skriftelik opgestel word en –
- 2.2.1 onmiddellik by die rektor en die skoolbeheerliggaam ingedien word;
- 2.2.2 in duidelik leesbare skrif op 'n prominente plek in die klaskamer aangebring word; en
- 2.2.3 aan alle leerders en hul ouers beskikbaar gestel word.
- 2.2 Leerders moet stiptelik en volledig voldoen aan die klasreëls sowel as enige mondelinge opdragte wat die klasopvoeder of enige personeel gee, en wat redelikerwys noodsaaklik is om hierdie gedragskode uit te voer en/of om die skool behoorlik en professioneel te bestuur.
- 2.3 Enige oortreding van die klasreëls sal as 'n oortreding van hierdie gedragskode en skoolreëls beskou word.

3. REËLS MET BETREKKING TOT VOORKOMS

- 3.1 Wanneer die bolyf en kop regop gehou word, mag die laagste punt van die hare nie aan die kraag raak nie.
- 3.2 Van die nek af boontoe moet die hare geleidelik dikker word. 'n Matige "step" kan toegelaat word. Die hare mag nie in die sogenaamde "mushroom-, mullet-, of mohawk-styl" gesny wees nie. Die mat van die hare moet dus die natuurlike kurwe van die kop volg. Die hare langs en agter die kop moet dieselfde lengte gesny wees.
- 3.3 As die hare aan die kant van die kop reguit gekam word, mag dit nie aan die ore raak nie.
- 3.4 Bakkebaard mag nie laer as die onderste punt van die gaatjie in die oorskulp strek nie. Leerders moet skoon geskeer wees.
- 3.5 Indien die kuif vorentoe gekam word, mag dit nie aan die wenkbroue raak nie.
- 3.6 Geen verkleuring van die hare word toegelaat nie. Gel en mousse mag gebruik word om weerbarstige hare te beheer.

- 3.7 Indien die hare kort geskeer word, geld die volgende as die minimum vereistes: nr. 1-kammetjie vir matrieks en nr. 2-kammetjie vir die res van die skool.
- 3.8 Geen vlegsels (“braiding”) word in hare toegelaat nie.
- 3.9 Die algemene indruk moet netjies wees en die haarstyl moet nie onnodige aandag trek nie.

4. SPORT EN BUITEMUURSE AKTIWITEITE

Die skool se amptelike sportbeleid word beskou as 'n byvoegsel tot hierdie reëls. Daar word van leerders verwag om aan 'n somer en winter aktiwiteit deel te neem. Deelname is ook verpligtend tydens eksamentyd.

- 4.1 Deelnemers aan sport en buitemuurse aktiwiteite
 - 4.1.1 Leerders wat gekies word om die skool te verteenwoordig as deelnemers in enige sportaktiwiteite of namens hulle interne spanne, moet geklee wees in die amptelike sportdrag, skooldrag of die voorgeskrewe drag soos bepaal deur die betrokke opvoeder, tydens en na deelname in sodanige aktiwiteit.
 - 4.1.2 Van alle leerders wat deelneem aan gemelde sport-aktiwiteite word lojaliteit teenoor die skool en mede-deelnemers verwag. In besonder word van deelnemers verwag om betyds en stiptelik aan te meld by die plek waar die aktiwiteit plaasvind of vanwaar die deelnemers vertrek na die betrokke plek van deelname. 'n Leerder sal slegs verskoon word van 'n aktiwiteit waarvoor hy gekies is, indien verskoning by die relevante onderwyser gemaak word.
 - 4.1.3 Dit word van deelnemers aan gemelde sportaktiwiteite namens die skool verwag om te alle tye hoflik op te tree teenoor en om te voldoen aan die beslissings, voorskrifte en opdragte van
 - 4.1.3.1 die sporthoof en die opvoeder betrokke by die spesifieke sport;
 - 4.1.3.2 die skeidsregter of beoordelaar ten aansien van die betrokke aktiwiteit;
 - 4.1.3.3 die spankaptein.
 - 4.1.4 Alhoewel dit aanvaar word dat leerders wat aan sportaktiwiteite deelneem dit met oorgawe en met volle inspanning doen, word van sodanige leerders verwag om selfbeheersing en dissipline toe te pas. In die besonder mag leerders nie op 'n onsportiewe wyse optree nie en mag hulle nie vuil of beledigende taal gebruik of betrokke raak in gevegte of insidente of hulle skuldig maak aan vuil- of onbehoorlike spel van enige aard nie.
- 4.2 Toeskouers en ondersteuners van sport en ander buitemuurse aktiwiteite
 - 4.2.1 Alle leerders wat enige skoolaktiwiteit as toeskouers of ondersteuners bywoon sal, benewens die verpligting om die bepalinge van hierdie gedragskode na te kom, hulle weerhou van ontwrigtende, onbehoorlike, opstandige, onnodig opruiende of onbetaamlike gedrag. In die besonder mag leerders nie negatief reageer op die beslissings van beoordelaars of skeidsregters nie.
 - 4.2.2 Leerders wat enige skoolaktiwiteit bywoon sal hulle onderwerp aan en gehoorsaamheid openbaar teenoor enige opdragte en aanwysings aan hulle gegee voor, tydens en na afloop van die betrokke aktiwiteit deur die rektor, enige opvoeder, lid van die leerraad / verteenwoordigende raad van leerders en ander skoolleiers of ouers deur die rektor aangestel om te help met die vervoer, toesig of kontrole van leerders wat vervoer word na of van die betrokke aktiwiteit of dit bywoon.
- 4.3 Die reëls soos hierbo uiteengesit sal ook van toepassing wees op enige deelname aan enige buitemuurse aktiwiteit benewens sportaktiwiteite, behalwe waar dit ooglopend nie van toepassing is nie.

5. SKOOLEIENDOM

- 5.1 “Skoleiendom” sluit die volgende in:
 - 5.1.1 die grond en geboue deur die skool beset en enige permanente aanhegting aan sodanige grond en geboue;
 - 5.1.2 alle ander eiendom, insluitende toerusting, boeke, voorraad, motorvoertuie en dies meer, wat die skool as eiendom besit of as huurder besit of stoor, of ten opsigte waarvan die skool vir die beskadiging of verlies daarvan wetlik aanspreeklik gehou kan word.

- 5.2 Aangesien die skool ontwikkel en opgerig is vir gebruik deur alle leerders wat daar skoolgaan, is alle leerders verplig om alles in hul vermoë te doen om die skool se eiendom te bewaar, sodat dit tot voordeel van alle huidige en toekomstige leerders van die skool gebruik kan word.
- 5.3 Geen leerder mag enige skool-eiendom van die skoolperseel verwyder sonder die vooraftoestemming van die skoolhoof of 'n opvoeder van die skool nie.
- 5.4 Leerders mag nie enige eiendom van die personeel van die skool, medeleerders, besoekers aan die skool, of lede van die publiek hanteer, beskadig, vandaliseer, skend of vernietig nie. Hierdie reël geld vir eiendom op die skoolterrein, in die onmiddellike omgewing van die skool, by of naby die plek van enige skoolaktiwiteit, sowel as enige voertuig waarmee leerders vervoer word en die eiendom daarop.
- 5.5 Enige leerder wat enige skool-eiendom opsetlik misbruik, beskadig of verniel, moet dit vervang of daarvoor betaal. Vernietiging en/of beskadiging van eiendom is 'n strafbare oortreding.

6. MATRIEKRAAD / VERTEENWOORDIGENDE RAAD VAN LEERDERS

- 6.1 Die VRL, PRD en skoolleiers is saam met die personeel van die skool verantwoordelik vir algemene skooldisipline.
- 6.2 VRL-lede, PRD en ander skoolleiers moet leerders wat oortree na die personeel van die skool bring, waarna lynfunksies gevolg sal word.
- 6.3 Alle leerders moet enige redelike voorskrif van 'n lid van die VRL, PRD of 'n ander skoolleier gehoorsaam, en moet die VRL, PRD en ander skoolleiers ondersteun en samewerking verleen in die behoorlike uitvoering van hul pligte.

7. SKOOLWERK EN HUISWERK

- 7.1 Daar sal te alle tye 'n ordelike atmosfeer in die klaskamer heers. Leerders mag nie onderrig versteur of verhinder nie.
- 7.2 Leerders moet klasopdragte stiptelik nakom.
- 7.3 Alle leerders sal 'n huiswerkboek/elektroniese dagboek gebruik volgens die voorskrifte van die rektor of klasopvoeder.
- 7.4 Leerders moet die voorgeskrewe huiswerk doen en dit stiptelik teen die bepaalde spertyd by die betrokke opvoeder indien. Versuim om aan hierdie reël te voldoen kan slegs verskoon word indien die leerder op die dag waarop die huiswerk voltooi moes gewees het, 'n skriftelike nota van sy ouers met 'n aanvaarbare verduideliking vir die versuim aan die opvoeder oorhandig.
- 7.5 Alle leerders moet hul voorgeskrewe skoolwerk met ywer, pligsgetrouheid en toewyding doen om sodoende 'n deurlopende werksetiek te ontwikkel.
- 7.6 Leerders is verplig om enige werk wat hulle gemis het, so spoedig moontlik in te haal. Dit is die leerder se verantwoordelikheid om uit te vind wat hy gemis het.
- 7.7 Leerders beweeg vinnig in enkelgelid aan die linkerkant in gange van die een klas na die volgende. Indien 'n leerder die badkamer besoek tussen periodes, mag hy nie laat by die volgende klas opdaag nie.

8. TOETSE EN EKSAMENS

- 8.1 Alle leerders is verplig om hulle aan die toetse en eksamens wat deur die opvoeders aan hulle opgedra word, te onderwerp. Versuim om aan hierdie reël te voldoen sal slegs in uitsonderlike gevalle verskoon word, mits die ouers van die betrokke leerder op die vroeë moontlike geleentheid 'n volledige en aanvaarbare skriftelike verduideliking aan die skoolhoof oorhandig.
- 8.2 Leerders moet hulle met die afneem van toetse of eksamens van enige vorm van oneerlikheid weerhou.
- 8.3 Leerders wat vir toetse en of eksamens afwesig is, moet 'n geldige mediese sertifikaat aan Kamer 14, graadhoof en vakonderwyser oorhandig op die vroeë moontlike geleentheid. Versuim om 'n mediese sertifikaat in te handig sal beskou word as afwesig sonder geldige verskoning en geen punte sal vir sodanige toets/eksamen in berekening gebring word nie. Toetse/eksamens word nie op latere stadium oorgeskryf nie.

9. MOTORVOERTUIG EN MOTORFIETSE

- 9.1 Geen leerder mag 'n motorvoertuig of motorfiets op die eiendom wat deur die skool en/of koshuis geokkupeer word bring nie, tensy hy beskik oor die voorafverkreë skriftelike toestemming van die rektor of ander personeel deur die rektor genomineer en tensy hy stiptelik voldoen aan enige voorwaardes waaraan die gemelde toestemming onderhewig mag wees. Indien 'n leerder nie in besit is van sodanige toestemming wanneer hy deur enige lid van die personeel, beheerliggaam of matriekraad / verteenwoordigende raad van leerders versoek word om dit te toon nie, sal dit geag word dat hy nie oor sodanige toestemming beskik nie totdat hy die teendeel kan bewys.
- 9.2 Die bestuur van 'n motorvoertuig of motorfiets deur 'n leerder op so 'n wyse dat dit 'n risiko of moontlike nadeel inhou vir ander leerders op die skoolterrein of ander leerders en lede van die publiek in die onmiddellike omgewing van die skoolterrein, word ten strengste verbied.
- 9.3 Leerders sal te alle tye die verkeersreëls op en om die skoolterrein nakom.
- 9.4 Alle motorvoertuie, motorfietse en fietse word op eie risiko op en om die skoolterrein parkeer. Toestemming aan matriekleerders sal gegee word vir sodanige parkering nadat hulle suksesvol daarom aansoek gedoen het by die assistent graadhoof.

10. KOSHUISREËLS

Die reëls, reëlings, beleidsdokumente en regulasies van die koshuis word beskou as 'n byvoegsel tot hierdie Dissiplinêre beleid.

11. STIPTELIKHEID

Leerders sal op die bestemde tyd aan die begin van die skooldag en met die aanvang van enige ander skoolaktiwiteit opdaag. Wanneer leerders laat kom, moet hulle 'n skriftelike verskoning van hul ouers verskaf. Leerders wat laat opdaag, moet eers by Kamer 14 aanmeld voordat hulle na hul betrokke klas gaan.

12. AFWESIGHEID VAN SKOOL

- 12.1 Leerders mag slegs in uitsonderlike gevalle afwesig wees van die skool, en dan slegs met die skriftelike toestemming van die rektor of sy verteenwoordiger indien hy nie beskikbaar is nie.
- 12.2 Enige leerder wat sonder 'n aanvaarbare verskoning van die skool afwesig is word geag as afwesig sonder verlof, wat streng verbode is.
- 12.3 'n Leerder wat vir een tot drie agtereenvolgende dae van die skool afwesig is moet by sy terugkeer skool toe 'n skriftelike verduideliking van sy ouers voorlê. Afwesigheid vir meer as 3 (drie) agtereenvolgende dae sal slegs gekondoneer word indien 'n sertifikaat deur 'n geldige mediese praktisyn voorgelê word, behalwe in die geval van dood of trauma in die leerder se huisgesin of 'n ander rede deur die rektor goedgekeur.

13. OMGEWING

- 13.1 Leerders het die reg tot 'n veilige omgewing en skool wat opvoeding bevorder.
- 13.2 Leerders mag nie die skoolgronde of -geboue bemors nie.
- 13.3 Leerders wat toeskouers of ondersteuners by enige skoolaktiwiteit is moet die terrein deur hulle beset netjies en skoon agterlaat, en moet seker maak dat alle rommel opgeruim en in vullishouers geplaas word.
- 13.4 Leerders moet toilette skoon agterlaat.
- 13.5 Enige optrede of versuim van leerders wat 'n gesondheidsrisiko vir ander leerders veroorsaak of moontlik kan veroorsaak moet vermy word.
- 13.6 Dit is verbode om slagspreuke ("graffiti"), plakkers, plakkate en dergelike meer op enige oppervlakte by die skool aan te bring, sonder die toestemming van die rektor.
- 13.7 Leerders moet gehoor gee aan die redelike opdragte van die rektor, enige opvoeder of lid van die matriekraad / verteenwoordigende raad van leerders met betrekking tot die handhawing van 'n skoon en higiëniese skoolomgewing.
- 13.8 Leerders mag nie in besit wees van enige vorm van vuurwerke in 'n skoolgebou of op die skoolterrein nie

14. SELFONE

Die bring van selfone skool toe word ten sterkste ontmoedig. Wanneer 'n selfoon wel in 'n noodgeval skool toe gebring word, sal die volgende van toepassing wees:

- 14.1 Selfone/elektroniese apparaat mag slegs gebruik word in 'n akademiese les met die toestemming van die betrokke onderwyser en onder die toesig van die betrokke onderwyser.
- 14.2 Indien die leerder die selfoon gebruik sonder die onderwyser se toestemming, sal die selfoon (handstuk en simkaart) afgeneem word vir 'n tydperk van EEN week en in veilige bewaring toegesluit word, waarna die leerder dit kan afhaal. 'n Dokument sal as bewys aan hom uitgereik word.
- 14.3 Selfone moet op stilmodus wees gedurende skoolure. Indien 'n selfoon nie op stilmodus is nie, sal die leerder 'n waarskuwing ontvang. Die tweede keer sal die selfoon gekonfiskeer word vir EEN week.
- 14.4 Geen korrespondensie of gesprekke sal met leerders of ouers in hierdie verband gevoer word nie.
- 14.5 Geen selfoondiefstal sal deur die skool ondersoek word nie.
- 14.6 Geen leerder mag tydens 'n eksamen of 'n toets 'n selfoon in sy besit hê nie. Dit sal as 'n eksamen-onreëlmatigheid hanteer word en kan ook soms as 'n eksamen-oneerlikheid beskou word.

15. BOELIE

- 15.1 Die skool se amptelike boeliebeleid word beskou as 'n byvoegsel tot hierdie dissiplinêre beleid.
- 15.2 Leerders mag nie ander leerders, opvoeders of lede van die skoolgemeenskap seksueel of op enige ander wyse teister, dreig, afknou, met hulle baklei, intimideer of op enige materiële, fisiese, emosionele wyse of op die kuberruim te na kom of benadeel nie. (Soos vervat in boeliebeleid)

16. DWELMBELEID

Die skool se amptelike dwelmbeleid word beskou as 'n byvoegsel tot hierdie dissiplinêre beleid.

17. AANVULLINGS

Die skool se amptelike beleid oor aanvullings word beskou as 'n byvoegsel tot hierdie dissiplinêre beleid.

18. SPORTBELEID

Die skool se amptelike sportbeleid word beskou as 'n byvoegsel tot hierdie dissiplinêre beleid.

19. VRYSTELLING VAN BEPALINGS VAN DIE GEDRAGSKODE

- 19.1 Leerders kan op kulturele, godsdienstige of mediese gronde skriftelik by die beheerliggaam aansoek doen om algehele of gedeeltelike vrystelling van een of meer van die items wat in die gedragskode vervat is.
- 19.2 Sodanige aansoek moet volledige redes én stawende bewyse insluit. Die bewyslas rus dus op die leerder om die aansoek om vrystelling te staaf.
- 19.3 Aansoeke om vrystelling sal slegs aan die begin van elke skooljaar oorweeg word, tensy dringendheid of veranderende omstandighede aangevoer kan word.
- 19.4 In die oorweging van 'n aansoek om vrystelling sal die beheerliggaam geregtig wees om enige inligting in te win wat hy vir 'n regverdige beoordeling van die aansoek kan nodig ag.
- 19.5 Die beheerliggaam sal die aansoek om vrystelling met die nodige erns en verantwoordelikheid, en binne die raamwerk van die Grondwet en hofuitsprake oorweeg, en die leerder skriftelik van sy besluit inlig.

1. SKOOLDRAG-RIGLYNE

AMPTELIKE SKOOLDRAG

Die onderstaande riglyne word aan leerders voorgeskryf vir saalbyeenkomste, amptelike verteenwoordiging van die skool tydens uitstappies, sportbyeenkomste of soos deur die rektor bepaal.

1.1 Die maroen baadjie. (Mag glad nie in hand , oor die arm of skouer gedra word nie.)

1.2 'n Lang- of kortmou, toeknoop wit hemp.

1.3 Die skooldas.

1.4 'n Gryns, kort- of langbroek (geen noupybroeke).

1.5 'n Kortmou- of langmoutrui of geen trui nie.

1.6 'n Swart of 'n gryns belt.

1.7 Gryns kouse by 'n langbroek. Indien 'n kortbroek gedra word, moet die amptelike gryns kouse met die skoolkleure gedra word.

1.8 Slegs swart toeryg skoolskoene. (Geen stewels of die halfsteweltipe skoene is toelaatbaar nie.)

1.9 Die amptelike serp.

1.10 Op Maandae (saalbyeenkoms), word leerders toegelaat om hulle volle skool-erekleure, provinsiale of nasionale kleure te dra. Vol/erekleure moet saam met 'n wit hemp gedra word.

1.11 Tydens sport aktiwiteite, moet leerders op die pawiljoen hulle maroen skoolbaadjies dra.

2. SKOOLDRAG (OP GEWONE SKOOLDAE)

2.1 Somer (1ste en 4de kwartale)

2.1.1 'n Lang-/Kortmou toeknoop gryns hemp.

2.1.2 Die skooldas.

2.1.3 'n Gryns, kort- of langbroek (geen noupybroeke).

2.1.4 Gryns kouse by 'n langbroek. Met 'n kortbroek moet die amptelike gryns kouse met skoolkleure gedra word.

2.1.5 Slegs 'n swart of 'n gryns belt.

2.1.6 Slegs swart toeryg skoolskoene. (Geen stewels of die halfsteweltipe skoene is toelaatbaar nie.)

2.1.7 Die dra van die maroen langmoutrui (sonder die baadjie) is opsioneel.

2.1.8 Die dra van die maroen baadjie is opsioneel.

2.2 Winter (2de en 3de kwartale)

2.2.1 Soos vir die somer, behalwe dat die maroen baadjie elke skooldag aangetrek moet word.

2.2.2 Die amptelike kortmou- of langmoutrui mag nie in die winterkwartale sonder die skoolbaadjie gedra word nie.

2.2.3 'n Reënjas, reënpak of windjakkie vervang nie die maroen baadjie nie.

3. ALGEMENE VOORSKRIFTE

3.1 Truie

3.1.1 Geen "oortruie" of sportdrag mag saam met die amptelike skooldrag gedra word nie.

3.1.2 Geen anderkleurige trui as die maroen trui mag saam met die amptelike skooldrag gedra word nie.

3.1.3 Die langmou maroen trui mag wel sonder die baadjie gedra word in die somer, behalwe op amptelike dae soos saalbyeenkomste.

3.1.4 Matriektruie mag die gewone skooltrui vervang indien dit op 'n netjiese wyse gedoen word. Spesiale matriektopps vervang nie die skooltrui nie en mag slegs op die laaste Vrydag van 'n maand gedra word of soos ooreengekom met die rektor en betrokke graadhoof.

3.2 Maroen baadjie

Wanneer 'n leerder dié baadjie by hom het, moet hy dit aantrek en nie in die hand, oor die arm of oor die skouer dra nie.

3.3 T-hemde

Slegs 'n effekleurige T-hemp wat nie by die skoolhemp uitsteek (of deurskyn) nie, mag gedra word.

3.4 Broeke

3.4.1 Geen broek vervaardig van koordferweel, seil of denim word toegelaat nie.

3.4.2 Geen noupypbroeke is toelaatbaar nie - minimum wydte van pyp onder die knie: 20 cm.

3.5 Sweetpak

Wanneer die skool verteenwoordig word, moet die volledige skoolsweetpak gedra word.

3.6 Jasse

3.6.1 Slegs reënjasse, 'n reënpak of 'n windjakkie mag buite die skoolgebou saam met die amptelike skooldrag gedra word.

3.6.2 GEEN ander jasse is toelaatbaar nie.

3.7 Serpe

Slegs die amptelike serpe met die mate en kleure soos bepaal, word toegelaat.

3.8 Skooltas

3.8.1 Die versterkte, donkerblou PRG-skooltas is verpligtend.

3.8.2 Slegs die leerder se naam, graad en skoolnaam mag op die tas geskryf word.

3.9 Sportsakke

Wanneer 'n leerder die skool verteenwoordig, moet hy die skool se amptelike sportsak gebruik.

PROFIEL VAN 'N PRG-LEERDER:

- **Handhaaf hoë morele en etiese standaarde. PRG-HEIR**
- **Respekteer alle gesagsfigure.**
- **Respekteer ander se besittings.**
- **Respekteer ons omgewing deur rommel op te tel i.p.v. rommelstrooi.**
- **Dra by tot 'n positiewe leeromgewing**
- **Basiese maniere toepas soos asseblief en dankie, staan op en groet alle persone.**
- **Wees trots op jou voorkoms.**
- **Loop nie met hande in die sakke nie.**
- **Neem verantwoordelikheid vir dade.**
- **Is te alle tye 'n goeie ambassadeur vir PRG en die skool se waardes.**